



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Lionel Messi-i Laureus awards angu

Pakistani Rangers temi Imran Khan puogo

VOL. XX NO. 207 (ADOK 207) DIMAPUR RASEMNÜ (WEDNESDAY)

MONUPII (MAY) 10, 2023

₹ 5.00

Nagaland nung Oil exploration, RIIN aser ULB atema shisa lemsatepogo

Kohima, May 9, 2023 (TYO): Nagaland sorkari oil & gas exploration aser RIIN atema kin teloktem aser Civil society Organizations (CSOs) den külem senden amendang telemtetba tajung ka magiteti tembangogo.

Iba senden ya Oil and Gas Exploration & Production, Register of Indigenous Inhabitants of Nagaland (RIIN), The Nagaland Village & Tribal Councils Act 1978 aser Urban Local Bodies (ULBs) onüktem jembitsü atema ayongzük.

"Senden junga menogo aser sorkari 1970s tetenzüklen nungi Nagaland-Assam Disputed Area Belt nung oil exploration indang osang metedaktsü" ta Power & Parliamentary Affairs Minister K. G. Kenye-i ashi.

Senden nung RIIN onük lemsatep. Iba atema Bano Commission-i sorkar nem report agütsüogo aser sorkari nübertem dang nungi tebilemba meshir, ta Kenye-i ashi.

The Nagaland Village & Tribal Councils Act of 1978 aser ano Urban Local Bodies (ULBs) atema Act tasen ka yanglutsüba indang benoka lemsatep ta paisa shisem.

Tanü senden nung adenertemi Assam sorkar den oil exploration atema MoU nung sign süteptsü mulunga agizük asü koda ta osangbeneri asingdangdang "mezüingbo state ana nungi Chief Minister temi MoU nung sign



May 9, 2023 nü Secretariat Conference Hall nung Power & Parliamentary Affairs Minister K.G Kenye, Information and Public Relations and S&WC Advisor Imkong L Imchen aser Principal Secretary to Chief Minister Abhijit Sinha, IAS nungertemi osangbener den jembiba angur.

sütepogo ta nisungtemi aibelena bilem saka tenati oil exploration atema onük kar nung mulungtepba dang liasü" ta Kenye-i langzü.

Naga yimten melatet tashi oil explorations memulungtsü ta Naga yimten teloktemi ashiba atema Kenye-i "parnoki ashibaji tim dang saka Political Affairs Committee ka tentetba sülen state sorkari parnok den iba onük lemsateptsü" ta Kenye-i ashi.

"Nagaland aser Assam na tsüingda 50:50 oil royalty lemsateptsü indang kodanga mejembidang liasü, saka Chief Minister Neiphu Rio-i inyakba den Union Home Minister-i tebang aiba ajanga iba inyakyim mulunga agizüktepogo. MoU atema maparen inyakdar" ta Soil & Water Conservation and IPR

Advisor Imkong L. Imchen-i ashi.

"Tanü senden nung Chief Minister Rio-i Assam den mesüra Nagaland-Assam-Government of India tsüingda oil exploration atema MoU kecha agitepa mali ta nenshia shiogo" ta Imkong-i ashi.

Iba onük atema lenmang ka lapokogo aser iba ya tajung lir. Sendaktepa alirtemi tebilembatem lemsatepogo aser itemji agizüka inyaka aotsü, ta paisa shisem.

Sorkar tekaratiba nung Nagaland Municipal Act tasen ka yanglutsü indang osang metedaktsütsü ta Advisor Imkong-isa ashi.

RIIN atema datelines ana mayutsü saka 1979 küm tribal belt makümdang aser ano statehood mangudang Dimapur

nung arua aliba India sensotem mezüingdoktsü, ta paisa ashi.

"Tesüiba nung indigenous certificates manguba nisungtem atema sorkari lenmang bushiteptsü. 1979-i melentsü shidangogo saka datelines ana mayutsü" ta Minister Kenye-ia RIIN atema ashi.

"Tanü senden nung December 1, 1963 nung ajemdaker RIIN mapa tenzüktsü jembitepogo saka ano maneni cut-off date atema asüingdangteptsü" ta Principal Secretary and Home Commissioner, Abhijit Sinha-ia ashi.

Sorkari Village & Tribal Council Act indang rasaa metedaktsüogo aser nübertem dang iba amshiyim jangjatsüogo. Item ajak ya olemtep nung dena

lir aser MoU nung sign masüidang onük ajak angatetteptsü imlar ta Sinha-isa ashi.

Tanü senden nung adenba civil society teloktem aser kin hohotemi Naga nungeri mulunga magizük tashi oil exploration atema MoU nung sign masütsüla ta ashi. Parnoki RIIN ya 1963 dateline amshia tenzüktsüla aser Naga nunger temetentem nung ajemdaker Municipal Act tasen ka yanglutsüla ta ashi.

Nagaland sorkari Central Nagaland Tribes Council, Eastern Nagaland Peoples' Organization, Tenyimi Peoples' Organization, Eastern Nagaland Women Organization, Eastern Nagaland Students' Federation, Naga Students' Federation aser Angami, Ao, Chakhesang, Chang, Garo, Kachari, Karbi (Mikir), Konyak, Khiamnungan, Kuki, Lotha, Phom, Pochury, Rengma, Sumi, Tikhir, Sangtam, Yimkhiung aser Zeliang tribal organizations jaoka senden menogo.

Tanü senden amendang Nagaland Advocate General KN Balgopal-i urban local bodies, Principal Secretary (home) Abhijit Sinha-i RIIN o Nagaland Village and Tribal Councils Act, 1978 aser Commissioner and Secretary, Geology and Mining Libanthung Lotha-i oil and gas exploration and production indang telok dang rasaa metedaktsü.

Nagaland nung nisung crore 5 tashi literate kümdaktsütsü

Kohima, May 9, 2023 (TYO): Nagaland nung New India Literacy Programme (NILP) alizüing atongtsü atema mapa inyaker ta Commissioner & Secretary School Education and SCERT Nagaland, Kevileno Angami-i ashi.

NILP indang alizüing ya 2026-27 tashi nung nütsüing yongsük 5 crore tashi azüingtsü-zülutsü meteta kümdaktsütsüba lir.

Kiphire aser Mon district tem nung NILP atema master trainers indang training nung jembidang Kevileno Angami-i "Census 2011 ajanga India nung arishi küm 15 ser temapur non-literature population crore 25 lir" ta ashi.

2009 küm tenzükba Shakshar Bharat programme ajanga nisung crore 7 shi ayimjemogo aser tang tashi nung nisung crore 18 shi ka illiterate lir ta Kevileno-i ashi.

Sorkari nübertem den yaritepa aser integrated technology amshia nütsüing yongsük ajak azüingtsü-zülutsü meteta kümdaktsütsü atema National Education Policy 2020 ajanga ashir, ta laisa ashi.

United Nations Sustainable Development Goal (SDG) ajanga 2030 tashi nung nisung ajak

literate akümtsüla aser iba nung arishi küm 15 ser temapur non-literature nisungtem dena lir, ta Kevileno-isa metedaktsü.

NILP indang master trainers ama 2022-23 nungi 2026-27 tashi nung azüingtsü-zülutsü memeter nisung crore 5 shi ka shia meteta kümdaktsütsüla, ta laisa ashi.

Central Budget 2021-22 sangdongba sülen aser National Education Policy 2020 den külemi NILP indang mapa tenzük, ta laisa ashi.

Nagaland nung tesüiba küm ana district ana nung illiterate population 44,000 aliba nungi parnok 35,000 tashi literate kümdaktsüogo aser taküm alizüing atongtsü ta laisa ashi.

Iba sentong nung School Education Director Wonthungo Tsopoe menden liasü aser Principal Director Thavaseelan K-i anküp tepela o jembi.

Anogo asemnü training ya Ministry of Education-i State Literacy Mission Authority Nagaland den yaritepa ayongzük.

Taküm atema Kiphire aser Mon district tem nung temulung agütsütsü aser shilem lemsar tanga district tem nunga kasa mapa inyaktsü.

Dimapur nung NSCN/GPRN tanishir kati kaketshir ka khaset

Dimapur, May 9, 2023 (TYO): NSCN/GPRN Khango nung Deputy Kilonser kati Hombar aonung Dimapur nung arishi küm 25 tain tetsür kaketshir ka khaset.

Tasüla ya Unity College, Dimapur nung MA final year azünger Supou P liasü aser ya injang agi akhaba sülen Faith Hospital nung aniok saka la taküm meküzmüktet.

Iba lendong ya Hombar aonung Zeliangrong colony, Dhobinallah nung atalok aser NSCN/GPRN Khango nung Deputy Kilonser ji Thingiu Khiam ta jangjaogo. Police-i pa den pa indang bodyguard Mongchon Khiam pua lir.

"Tetsür kaketshir ya tetongi khaset ama temulung meleme bilemer aser police-i AK rifle ka den magazines ana, 7.65mm indang 55 live rounds, .32 pistol ka den injangrep ka, walkie talkie ana aser Gypsy gari ka (NL 07C-1639) ka pua lir" ta Deputy Commissioner of Police (Crime) & PRO, Dimapur-i sangdong ka nung metedaktsü. Ajisüaka, social media osang

ajanga angazükba agi Thingiu Khiam ya kibong kümer kinungtsü den balalulaba nisung ka lir aser pai mapang talangka tejaklen nungi asür Supou ya aginüa aruba liasü.

Yasünga pai la mesüki aruba liasü saka lai memulungba agi tejashi nung injang khaloktsü ta social media nung nisung kari ashir. Ajisüaka iba tatalokba atema police-i FIR ka benoker bushisüingdanga arudar anungji iba maparen tembangba sülen ang kuli tejangja metettsü.

Naga Students' Federation (NSF)-i iba tatalokba khukhua aitsüba metedaktsüogo.

Iba ama tesempatsü mapa aser tebilemba tamajung yur inyaksangshiba ajanga asen loktiliba nung mepetmesü adokdaktsütsü. Tangatetba shitak alir ajaki iba tatalokba aitsütsüla, ta NSF-i sangdong ka nung ashi.

Ozüng amertemi jungjung bushisüingdangtsüla aser tekaratiba nung aibelener nem tapet temerenshi agüjang ta NSF-isa metedaktsüogo. Parnokisa asüri toktsür aoba

kinungertem den mangyim tejashi lemsatepogo.

Maneni, All Nagaland College Students' Union (ANCSU)-ia tanga sangdong ka ajanga tai maket kaketshir Supou P khasetba khukhua aitsüba metedaktsüogo.

Naga nungeri yimjung aser putepa alitsü atema merangba mapang ka nung iba ama lapi mapa ajanga loktiliba asoshi lendong bentsür arur. Anungji ozüing amertemi aibelener nem ozüing nung aliba ama temerenshi tulutiba agütsütsü mepishir, ta ANCSU-i ashi.

Kija mesüra telok shingaa aibelener bail nung agizüktsü memerangtsüla aser tangatetba shitak alir ajaki iba tatalokba aitsütsü ayongzük, ta parnokisa metedaktsü.

"Tasüri toktsür aoba kinungertem, Unity College kaketshirtem, tesayurtem aser temeimertem den mangyim lemsateper. Tsüingremi tai maketba kaketshir ka taküm laluba tejashi koktettsü atema tesünep agüjangma" ta ANCSU-isa metedaktsüogo.

Aliba yimtak züngi benjung May 9-10 tashi amumger



(Abelen) Taoba 2022 kum Cucumber Festival Aliba 2022 sentong agiba nung inyakbatem noksa aser Aliba nung züngi lu ayimba koda tenzük item indangji terasa tatsüka züluba kaket tanü Addl. Director of Agriculture Nagaland Wt.Temsuienla-i sayatsür kelen ADC Mokokchung Chumlamo Humtsoe (Tabelen nungi anabuba) aser lenirtem den tangokba noksa nung angur. (Achiji) Züngi benjung nung züngi ayokba noksa nung angur.

Aliba, Monupii/May 9(TYO): Tanu Aliba yimtak May 9 aser 10 nü ta agitsü asoshi ayongba Cucumber Festival Aliba 2023 tenzükogo.

Tanu iba sentong nung alakteta jaoker Addl. Director of Agriculture Nagaland Wt.Temsuienla-i jembidang Aliba yimtsüng nung Cucumber Festival amungba ya takok benjung ka lir. Asür Purremba-i mezüngbuba iba züngi lu ya ayim aser ibaji Aliba nungeri angazüka ayimba aser meranga inyaka züsentetba ajanga iba takok benjungji amungerta Aliba nunger nem tenungsang aguja ashi.

Wt.Temsuienla-isa asen Naga lima tzü mupong aser ali

tajung, anungji asenoki mozü mora mamshi-i tsünütetba züngi(Organic cucumber) amshitet nungbo tang nungi kanga agi tajungba asütsü,aji asünung Aliba nunger züngi lu ayimertemi iba yimya nungji inyaka Aliba yimtsüngji Naga lima nung organic züngi tsünütetba yimtsüng ta sangdongtetsüsa inyakangmata adenshia alir Aliba nunger züngi lu ayimertem ajungmeso ashi.

Nüburtemi alima mupong melenshiba(climate change) indang jembir, meimchirtem joko iba mupong denji alitsüsa mapang agi bener arutsüogo, anungji mupong melenshiba den peta shisa ka-a aluji inyaksülata Temsuienla-isa ashi. Laisa alu

aiben ayimba tesem nungji ali temoji chimar, anungji süngo tuo aser jana ona bendena ibaji anepalua shirepdakja ali temo melen amshitetsüsa lenmang aika lir, anungji item amala tasaji amshia inyaksü kanga nungtakerta metetdakja ashi.

Iba Cucumber Festival Aliba sentong ya takum agi tanabenbuba agir, taoba 2022 kum iba sentong agiba nung inyakbatem noksa aser Aliba nung züngi lu ayimba koda tenzük item indangji terasa tatsüka züluba kaket tilaka tanu Addl. Director of Agriculture Nagaland Wt.Temsuienla-i sayaja liasü.

Kasa sentong nung Addl.Deputy Commissioner

Mokokchung Chumlamo Humtsoe aser Aliba Putu Menden nungi Yimsüsür kati ta tenati tayongzükba o tatsütsü jembiba den Project Director DRDA & Co-Convenor, Organising Committee Wt.Toshimongla ajanga tarurtem pela agizükba o jemi aser Convenor Organising Committee Wb.Lipokmar-i tepela o jembiba den sentong nung Tsüngrem dang lenisüba temoatsü meshia Aliba Baptist Arogo Pastor Rev.Nungshi-i sarasadem aser Organising Committee züngsem Dr.Cressida ketdangsuba nung iba sentong agi.

Tanü iba sentong nung Aliba

yim temeket alir Chungtia, Kinunger aser Satier nungia aruagi stall lapoka shilem agia liasü aser Mokokchung town aser tesem balala nungi nüburtem aika adenshia sentong nung adenba den züngi raktepa alia liasü.

Taoba 2022 kum iba Cucumber Festival nungtem nung Aliba nungeri züngi metsüh 6000 dang arem saka iba jagi Cucumber Festival nung temelung süa mamshitet nung takum iba festival nungtem nung Aliba nungeri züngi metsüh 22000 arem aser iba nungjagi 20000 kümteta iba nungjagi tangtetbatem anogo ananü iba festival nung amshitetsüsa tangteta lir.

First State Entrepreneur Award 2022 sentong agiogo

Dimapur, Monupii/May 09 (TYO): First State Entrepreneur Award 2022 sentong ka Directorate of Industries & Commerce indang Conference Hall nung May 9, 2023 nü agia liasü.

Iba sentong nung Director, Industries & Commerce, P Temjem Jamir-i ashiba agi, grass-root economy nung kongshia ecosystem yanglutetba

nung dangar dak nungi alakteta shilem tajung agiba Naga Entrepreneurs nem tetushi agütsütsü nükjidong nung Nagaland sorkar nungi temelaba agir iba Award ya tentet.

Commissioner & Secretary to the Government of Nagaland, Kekhrievor Kevichusa-i jembidang, Department aser entrepreneurs tsüngta tali tonglatongsüngtepa tesendaktep

tajungba kumshitsü ajungshia liasü.

Tayari tajungba atema entrepreneurs temi sorkar dang nungi tali akhangtsüla, ta pai ashi.

Lokti tentet ajungai shilem agiba ajanga dang local economy tajungba yangertetsü, ta paisa ashi.

Iba sentong nung entrepreneurs tenet nem tetushi agüja liasü.

Basics of Education Research kaket ka saya



Dimapur, Monupii/May 09 (TYO): Nagaland University indang CBCS syllabus nung ajemdaker Education Core Course atema 'Basics of Educational Research' kaket ka May 8, 2023 nü Fazl Ali College, Mokokchung indang

principal, Dr. I. Wati Imchen-i pa indang office nung sayaja liasü.

Iba kaket ya Department of Education, Fazl Ali College, Mokokchung ajanga zülua liasü aser iba kaket sayaba sentong nung Vice-principal, IQAC

Coordinator aser Department of Education nung tesayurtem dena liasü.

Basics of Research dak sendakba nung kaketshir nem tangatetba tejangja ka agütsütsü nükjidong nung iba kaket ya zülua liasü.

Dimapur nung gari kati scooty ka dak atsük, nisung ka asü

Dimapur, Monupii/May 09 (TYO): Dimapur Police ajanga sangdong ka nung ashiba agi, May 8, 2023 aonung 9:54 ako meta scooty ka (B/R No. NL07EB7343) dak mejangjaba gari kati Purana Bazar tsütsü DMC toll tax Dimapur anasa tsüker ajen.

Scooty anisang ya Merithung Kithan (25yrs) s/o Mungchio Kithan v/o Akok PO/PS Sanis R/o 6 Miles dist. Chumukedima ta jangjaogo. Tesülen mena alir mezüngbuba ya Mhayamo Kithan (22yrs) s/o Longshihung Kithan v/o Akok R/o Wokha (Soren colony)

asertanabuba ya Zuchamo Patton (25yrs) s/o Myanthing Patton v/o Akok R/o Chumukedima ta jangjatet.

Scooty anisang aser tesülen mena alir tanabuba tekolak kanga sashia yiru aser tesülen mena alir mezüngbuba tera yirua liasü, parnok ajak mozü ki kati anir ao, ta sangdong ajanga ashi.

Scooty anisang ya iba lendong nung yiruba zübu ajanga May 9, 2023 nü asü.

Iba tatalokba dak sendakba nung bushisüngdangtsü atema tapet ozüng kübok ken o ka benoka lir, ta sangdong ajanga ashi.

Dimapur nung DDMA senden amen

Dimapur, Monupii/May 09 (TYO): Meyi aruba mapang renemshia alitsü atema 1st Quarterly DDMA (District Disaster Management Authority) senden ka May 9, 2023 nü Deputy Commissioner, Dimapur indang Conference Hall nung mena liasü.

Iba senden nung Deputy Commissioner, Dimapur, Sachin Jaiswal-i ashiba agi, 1st quarterly meeting ya district ajak nung amener aser state level nung kum shia amener.

Item senden nung aruya aliba meyi mapang state kota renema lir, itemji asadanga jembir.

Pai department shia dang DDMA weather osang ita shia metetdaksütsüla aser osangtsüsang WhatsApp group

nung lemsatetpa mapang shidak nung nungdakba osettsüset agütsütsüla, ta ashi.

Paisa department shia dang alimar lendong balala ajurudang renemshia alitsü aser telangzüba agütsütsü ajungshia liasü.

Pai SDRF (State Disaster Response Force) dang ayong anasa aliba nüburtem dang tzümetsüng adokba mapang kumdanga alitsü asoshi training agütsütsü ayongzüka liasü.

Iba senden nung PWD (R&B), Water Resources, Dimapur Municipal Council, SDRF, Health & Family Welfare, Public Health Engineering aser Food & Civil Supplies department temi Monsoon Preparedness atema presentation agüja liasü.



Manipur nung zünga aliba Bihar nungi kaketshirtem Jayprakash Narayan Airport atongba sülen tangokba noksa nung angur.

Pilot-i longkak aitba sentong ka ayongzükogo

New Delhi, Monupii/May 9 (Agencies): Congress lenir Sachin Pilot-i Mongolbarnü sangdong ka ajanga, ochi mashi inyakyim amala ken o balala benoktsü asoshi anogo ana lir pa Ajmer nungi Jaipur tashi anogo pongu tetsüing agi jajatsü ta metetdaksüogo.

Rajasthan chief minister Ashok Gehlot-i ochi mashi inyakyim anema jenjang tapet magiba atema pa aitsüba den pa party nem bendanga agüja ali mali iba indang ashishiba mapang ka nung Pilot-i iba osang sangdongogo.

Gehlot-i Deobarnü Dholpur nung o jembiba indang benoka jembiba mapang Pilot-i ashiba agi, chief minister indang lenir ya Sonia Gandhi masü saka Vasundhara Raje ama reprangtetogo.

O jembiba mapang Gehlot-i, 2020 küm Pilot-i anir Congress MLA temi pa anema nokdakba mapang Raje aser opposition Bharatiya Janata Party (BJP) lenir ana; taoba

assembly speaker Kailash Meghwal aser legislator Shobharani Kushwah nungeri pa nem teyari agüja sorkar kümzüka ayu ta ashi.

Kasa mapang nung Gehlot-i, 2020 küm yimden yimsüsüba tsütsü mepetmesü adokba mapang legislator shirnoki sen agiogo parnok dang Union home minister Amit Shah nem sen meyipa agütsütsü mepeshia liasü.

Pai ashiba agi, parnoki sen meyipa magütsüra parnok Shah-i teti dang nongshia alitsü.

Legislator tem nem Shah-i sen agütsü ta ashiba ya Pilot-i aitsüogo. "Gehlot inyakyim anema onok longkak aita liasü. Iba ya aitsütsü langa lir aser tamendakdak makai aitsüba ni khenyongi magizüker," ta pai ashi.

Pilot-isa, Gehlot-i pei party nungi MLA tem aitsüba ya mangateter. "BJP lenirtem tenüing asanger aser Congress lenirtem aitsüba ya nibo mangateter. Iba ya tim masü,"

ta Pilot-i ashi.

Paisa, nisung kari Congress tashi meiti kumdaktsüner saka parnoki aji matalokdaksütsü, ta ashi. "Dholpur nung Ashok Gehlot-i jembiba o angaba sülen onoki kechiba ochi mashi inyakyim anema jenjang magiteter aji jangjaogo. Nüburtem dang nungi lenir shinga tongtibangba mali," ta pai ashi.

Pilot-i ashiba agi, Ajmer nungi Jaipur tashi Jan Sangharsh Padyatra sentong ayongzüka agiba mapang pai lanurtem dak sendakba ken o benoktsü. "Nüburtemi pusemba mapang telemtetba shitak agitsüla ta ni amanger. Iba yatra sülenang tanga telemtetba tem agitsü," ta pai ashi.

2020 küm July ita Pilot aser Congress lenir 18-i Gehlot anema nokdak. Iba mepetmesü ya ita ka shi atsülanga ao aser iba sülen Congress lenirtemi Pilot ya deputy chief minister aser state Congress tir mapa nungi agin.

PM Modi-i Rajasthan nung project tem amenoktsütsü

New Delhi, Monupii/May 9 (Agencies): Ato Kilonser Narendra Modi-i Bodhbarnü Rajasthan nung sen crore 5,500 dak tema alang development project tem amenoktsütsü, ta sangdong ka ajanga metetdaksü.

Jaipur nung BJP otongdar kati ashiba agi, Ato Kilonser-i Sirohi district kübok Abu Road nung party-i ayongzükba public rally ka nung o jembitsü.

Ato kilonseri amenoktsütsü aliba project tem ajanga iba tesem nung infrastructure aser connectivity tajungba kumdaktsütsü ta PMO-i ashiba den, lenmang aser railway maparen balala ajanga oset aser service tem belenshitsü

tayongba kumdaktsütsü aser iba ajanga shishilembaba tali tajungba küma iba tesem nung aliba nüburtem libaliro jenjang ajungkettsütsü, ta shisem.

Project tem rongnung Modi-i, lenmang yanglutsü atema nungshilongtem azüingtsütsü, Rajsamand aser Udaipur nung lenmangtem two-lane kumdaktsütsüba aser Udaipur railway station yanglushitsüba densema lir.

Paisa, gauge conversion project aser Rajsamand kübok Nathdwara nungi Nathdwara jila tashi line tasen amenoktsü asoshi nungshilongtem azüingtsütsü.

Maneni Modi-i national highway projects asem

semzüktsütsü, kong NH-48 nung Udaipur nungi Shamlaji section kübok km14 talang six lane, NH-25 nung Bar-Bilara-Jodhpur Section kübok km110 talang 4 lane lenmang atsülangtsü asoshi aser NH 58E nung 47 km talang two lane lenmang densema lir.

Ato Kilonserisa Brahma Kumaris nung Shantivan complex semdangtsü.

Ano PM-i, super speciality charitable global hospital ka, Shivmani old age home tanabuba shilem aser nursing college atsülangtsü atema nungshilong azüingtsütsü. Iba mozüki ya Abu Road nung ali acre 50 nung amenoktsü, ta PMO-i ashi.



Karnataka Assembly election magi tsüingda polling ketdangsürtem EMV aser tanga voting material tem bener pei tata polling booth temi senshiba noksa nung angur.

Odisha nung Maoists telungpur 3 khaset

New Delhi, Monupii/May 9 (Agencies): Odisha kübok Kalahandi district nung Mongolbar anepdang state intelligence wing (SIW) nungi sepaitem aser Maoists telungpurtem khatepba sülen telungpu asem khasetogo aser deputy superintendent of police (DSP)-rank officer ka yirua liasü.

Sepaitem aser Maoists na tsüingda Odisha kübok Kandhamal district den arrtsü nung aliba Kalahandi nung Madanpur Rampur police station anasa Taperenga-Ludengad arem nung khatepba liasü.

Additional director general of police (anti-Maoist operations) Amitabh Thakur-i ashiba agi, Maoists tem indang osang bendenba mapang SIW team-i Kalahandi nung Madanpur Rampur police station anasa Taperenga-Ludengad arem nung Maoist pur tesepe ka tenteta aliba indang osang angazüka liasü.

"Meita aotsü atema Bhawanipatna jila nungi Special Operation Group commandoe tem anir arutsü asoshi mapang

talangka agitsü asü nung SIW sepaitemi Taperenga-Ludengad arem meita ao. SIW sepaitem iba tesem tonga aoba mapang Maoists temi parnok dak injang khaloktsü. Sepaitemi meyiper telungpur dak akha tenzük aser parnok asem khaset. Onok indang DSP-a ka tetsüing yiru aser Bolangir jila nung mozüki kati anir ao aser iba sülen Bhubaneswar-i anirogo," ta Thakur-i ashi.

ADG (ops)-i ashiba agi, khatepba tesem nungi AK-47 rifle ka ngutetogo aser iba ajanga asür Maoists tem rongnung kabo divisional committee mesüra state committee nungi liasü ta jangjaogo.

SIW ketdangsürtemi Mongolbarnü meita aoba ya parnok inyakyim rongnung ka liasü, shirnok yimya agi Maoist pur senzüsenpongba indang osang bendener. Chhattisgarh nung April 26 nü District Reserve Guard (DRG) 10 aser civilian gari anir ka tepsetba sülen tang telungpurtem senzüsenpongba kanga kumdanga meita atadar.



Rabindranath Tagore asoba anogo Parliament House Central Hall nung pa nem tetushi agütsüba sülen Lok Sabha Speaker Om Birla aser tanga ketdangsürtem tangokba noksa nung angur.

Congress-i PM anema ECI nem tashishiba agütsü

New Delhi, Monupii/May 9 (Agencies): Karnataka Assembly elections agitsü lia Model Code of Conduct (MCC) aser Representation of People Act, 1951 kübok provisions balala nung aibelenba atema Congress party-i Mongolbarnü Election Commission of India (ECI) dang Ato Kilonser Narendra Modi aser Bharatiya Janata Party (BJP) lenirtem anema tangsa tang jenjang agitsü khangogo.

Tashishiba nung Congress MP Randeep Singh Surjewala-i, 'silence period' sülen Ato Kilonser Narendra Modi indang Twitter handle nungi video osang agütsüba aser tanga BJP lenirtemi live interview nung shilem agiba TV news channel ka nung sayuba tuteta ashi.

"Election Commission-i iba ya angaoka yur, Narendra Modi, Amit Shah, JP Nadda, Yogi Adityanath aser BJP party anema jenjang tapet agitsüla," ta shiti nung shia lir.

"Temetetsükaji Representation of People Act, 1951 kübok Section 126 nung aira item lenirtem ya Parliament aser legislative assembly nungi disqualify asütsü," ta shiti nung shia lir.

Assembly election agitsü

anogo ka lia Karnataka nung BJP-i sorkar kümtetsü ta shia Ato Kilonser Narendra Modi-i Mongolbarnü ashiba agi, taoba anogo ishika tsüingda state nung aliba nüburtemi pa dang temeim sayuba ya kecha dena medemdangtsü makok aser iba ajanga state ya lenla ajak nung number one kumdaktsütsü asoshi tali mulungtetshio.

"Karnataka nung aliba nüburtem ajak pungmangji kü pungmang lir. Asenok ajak longjemer nükjidong ka dak ranglokra, kecha tashi-ia asenok menokdangtetsü," ta pai video osang ka ajanga ashi.

Tashishiba shiti social media ajanga lemsatepba mapang Randeep Singh Surjewala-i, PM Modi-i electoral laws aser code of conduct nung aibelenba dak sendakba nung ECI tendangtsüba mapang ka lir, ta ashi. Paisa, PM-i "silence period," mapang electoral ozüing anema yimjak nung voter tem atsüa arutsü merangra ECI-i Constitution of India kübok Article 324 nung parnok nem nongloktsür aliba mapa benoka inyaksangshitsüla, ta ashi.

Karnataka nung assembly election May 10 nü agitsü aser May 13 nü vote azüingtsü.



TIR YIMYIM

YIMOBILEM (EDITORIAL)

DIMAPUR RASEMNÜ, MONUPII (MAY) 10, 2023

Timtem mapang pei tia meteter

Taoba hopta May 3 nungi tenzüka Manipur nung lendong tulu atalokba ajanga Manipur nungertem dang nungibo Manipur tesem balala nung bendanger kaketshir aser mapa inyakertemang shisatebuluba buluogo aser tang tashi ano karbo pei limai moutet timtem nung lir. Iba ama bendang lima nung lendong ajuruba mapang, pei pei state government-i anepalua pei ki tongtsübaji mulung anisungzük aser tepela kanga tulu lir. Kasaji, Nagaland government-ia Manipur nung azünger aser mapa inyakertem Naga nung meyirijang dak tali Manipur tesem balala nungi anidena timtem lendong ajak paidoker ki tongtsüba mapaji kanga junga inyakogo. Iba tensa tia indang bilemdang dang Manipur nung lendong atalokbaji temulung ashitsüka lir. Atangji, manger sangwa nung kibong aika nung pei tsürabur aser chirnur taküm samar mangyim jashi tia nung pei ki dena rongdoker mangyima amungdak kia maka temeimsü tia nung nisung meyirijang aika lir. Iba ama tia nung, asen sarasadem aser o agidang masü saka asenok temeim mapa agia parnok atongtsübaji kanga nungdaker. Ano külen, Manipur tesem balala nung Nagaland nungi Naga nung kaketreju balala nung azüngertem dang masü saka private mapa nung süngpak yangludak dena oa mapa inyaka alitsüsa akümba tia jagi asenoki asenoksasa asenok tia metetter. Iba jagi Naga nung lanurtem azümasen masüa ta sayur aser asenok Nagaland nung alir tanishirtemi lanurtem mapa inyaka alitsüsa lenmang melapoktsür ta meteter. Tang Manipur nung tetsübutsü lendong atalokba agi melitet pei ki bushia arur Naga nungertemji kar medical, kar agriculture, kar Sports aser kar Manipur Univeristy nung azüngertem aser ano tesem balala nung mapa balala nung ayangertem lir. Ibaji kodang bilemdangdir, Nagaland state kümer küm ter sülen akümba state Manipur dak asenok Nagaland nung alir Naga nungertem maparen aika nung metaloka alir ta jangjar. Ashiko, Manipur nung alir Manipur nungertem asoshibo Nagaland nung azüngtsüsa parnok makaba aser parnok nungdak kaketreju malitsüa akok. Ano, Nagaland nung Manipur nungertem mapa inyakertem aliyonga, asenok Nagaland nungi ia Manipur nung ayangertem ama masü saka parnokjibo hotel kiburtem, soruchioka parnoksa tajungba, anungji asenoka parnok hotel nung dang oa chiyonger aser tanga mapa inyakertemjia anogo sen tila agia ayangertem masü saka asenoki meinyaktetba mapatem parnok inyaker, anungji parnok nem taa tulu agütsür. Ajakji yutsür, Nagaland nungi Nagatsür parnok lirtenem tashi Manipur nung süng arangdak aser süngpak yangludak veneer mill nung inyakba osang angashidang, asenok Nagaland nung alir nübortem tia tali tejangjaba meteter. Item Nagatsürtem ayangba jagi pei tsürabur aser kinungertem mesüa alitsü südi. Parnokji pei lima nung mapa meinyaknuba agi ao masü saka pei lima nung parnok ayangtsüsa mapa makaba agi ao asütsü. Iba ama Naga nung lanurtem mapa inyaknüseta mapa magütsütetba tia indang bilemdang, Naga nung sen crore payiyila ya endoka election-i aidang nungibo kasa sen jagi Nagaland nung Naga nung lanurtem mapa inyaktsüsa industry tapu balala lapokyonga ao nungbo, tang amaji Naga nung lanurtem timtemseta tanga lima nung oa ayanga melila ta bilemer. Asenok rongnung tular aser takar shirnok ket nung rongsen ali, iba rongsen jagi MLA akümtsü asoshi dang mebilemi kasa rongsenji amshia lanurtem asoshi mapa adokdaksütsü aser nübortem asoshi rongsen poktetdaksütsü tangatetba aser nükjidong nung amshi nungbo, asen lima nung mapa tajung inyaker meinyakma adoktsü aser rongsen züintsü. Naga nungerto takar makar ajak tebilembaji MLA kümteter asü mekümtetter ta asüba ya dang na? Aji oda, MLA kümdaktsüba agi mapa adokdaksür aser rongsen poktetdaksür masü saka mapa manguba -manguba ta küma lanurtem timtemtsüsa aser alima sensak atentsüsa asenoki inyakba ajanga, Naga nung lanurtem bendanglen kar hotel kima ausu-marok shidoker, kar pi kima amang agi sangwa küma anüker, kar pi mang nemshitsür, kar mill tapu balala nung inyaker ta asenoki lanurtem aika bendanglen timtemdaksüdagi. Iba tiaji Covid mapang aser tang Manipur tensa tia ajanga asenoki kanga junga metetogo. Joko, asenoka nüchi küma arudi aser asen lanurtem asen lima nung pei akok mapa jangratema inyaka alitsüsa, asenokbo asen lima nung mapa aser rongsen yangludi.

OLEMSABANG

LAISHIBA NUNG ALIBA TEMEIM TAPU BALALA INDANG TATSÜ AKI

~ Mr. Y. Imti Tzüdir, Dimapur

Temeim (love) ojang ya Greek oshi nungbo tapu pezü (4) tashi lir, saka asen o nungbo ojang ka dak alaka balala lemsaa mali nung Lai aibelena ratettsü akok. Tasen Lai Greek oshi nung zülü; par oshi nung temeim tapu pezü indang tatsü agi agütsür. Iba ya aikati meteta alitsü südi saka memetettertem atemabo kanga tajangzük asütsü teyimla nung iba ocet zülur. Temeim tapu pezü indang tatsü agi itemi lir.

1. Phileo: Ibai yimya temeim nung amshir, nisung o nisung na tsüngda, kibong nung, kimang rongnung, aser taküm maliba osettsüset sapua benzüba. Tamang ka nung lungjema meimtepba len amshiba dak alaka phileo ya tamangbalenbo tetezü aketba o ama mamshir.

Tatishitsü:

- (1) Adianu temeimtep (2 Peter 1:7)
- (2) Sosem-tangsem aser tamanger rongnung meimtepba (Yohan 11:36; 15:19; 16:27).
- (3) Parnoki (anemsübatemi) lungjem nung sarademtsü meimba (Mt. 6:6; 10:37) item nungji Phileo ya amshia lir.

Phileo nungi agizükba ojang kar:

- (i) Philadelphia (U.S.A nung yimti ka tenung). Tetezü adianu temeimtep. (Ibri 13:1 - Adianu temeimtep maneni liang)
- (ii) Philadelphos: Adianu meimtepba (I Peter 3:8)
- (iii) Philanthropia: (jungnuba, meimnuba) (Tita 3:4)
- (iv) Philandros (Tita 2:4)
2. Stergo: Iba temeim ya talisa tsürapur o chirnur na tsüngda meimtepba anung amshir. Tasen lai nung item tekong nung angutsü: Rom1:31; 12:10; 2 Tim. 3:3.
3. Eros: Eros temeim ya item amala nung amshir; Shi azü tejangraba, azüabongba, maremteti aginüba, pei jangratemtsü peridaktsütsü jangraba, tangar indang kecha mebilemi pei nükjidong ataloktsü merangba temeim lir. Ibaitalisa tetsür aser tebur tsüngda shi temeimtep nung amshir. (Hosea 2:5,7; Ezekil 16:33). Eros ya tasen ali nungbo amshia mali südi.
4. Agape: Ibai temeim rongnung tulutibaji lir. Ibai Tsüngrem dak aketba temeimji lir (Phileo, Stergo, Eros) kati ka meimtepba ajanga dang adoker saka agape temeimbo yamaji masü. Kati sempaaka katibo meimba temeim. Tsükchir dang meimtsüba temeim (Mt. 5:44). Tsüngrem nungi anguba temeim ajanga dang ya inyaktet.

Agape telemsa pungu:

- (i) Tebu Tsüngremi Teshir Yisu Khrista meimba (Yohan 15:9).
- (ii) Tsüngremi meimchir kin ajonga meimer (Yohan 3:16).
- (iii) Tamanger dang Tsüngrem temeim (I Yohan 4:19).
- (iv) Amangbapuri Tsüngrem meimba (Rom 8:28; I Yohan 4:9).
- (v) Amangbapurtemi kati ka dang meimba (I Yohan 3:11)

Agape indang Tsüngrem o nung kechi ashir:

- (i) Ibai Tsüngrem nungi arur aser Tsüngremi mulungba lir (I Yoh. 4:10, 11).
- (ii) Ibai Tsüngremi ozüng agütsüba (LK. 10:27; Levi 19:18).
- (iii) Ibai Tsüngrem den tesendaktep makar dak malir. Temenen ajanga pa telungjem raksar, (Gal. 5:17-22, 25, 26; I Yoh. 2:15).
- (iv) Agape yagi tamanger kaji tamanger ama sayur (identify) (Yoh. 13:35).
- (v) Shibaisa Tsüngrem tsüngdang iba temeim sayur, tenük agi manguba temoatsütem renemja kar (I Kor. 2:9)
- (vi) Ibai tanela süngjang lir. (Gal. 5:22, 23).
- (vii) Kinungpurtemi kinungtsür dang iba temeim sayutettsüla. (Efesa 5:25)

Anungji Agape ya yamai ratettsütsü akok:

- (i) Pei ajungtsü mebilemi tangar ajungtsü bilema inyakba.
- (ii) Taginüba, tejangraba agi masü, mulungbena inyakba.
- (iii) Pei ajangzüktsü mechi masü saka tangar ajangzüktsü mechi nung meimba.
- (iv) Angutsü masü saka agütsütsü nükjidong yur meimba.
- (v) Tangar taküm jenjang (tanela süaka, temang shi nung süaka) yanglushitetsütsü teimla pei taküm tenlaba.
- (vi) Item temeim mapatem ya Khrista dak Tsüngremi temsüa jungkai adokdaksü. Yabo nisungi puratetba temeim masü saka Tsüngrem süngjang lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Parnoki Yisu-a sempa: Chris Pratt



Monupii/May 09, 2023 (Agencies):

"Guardian of the Galaxy" nung tongti shilem agisang Chris Pratt-i Tsüngrem dak amangba ya aiben media balala nung onük ka ama jembir. Aser pai Tsüngrem indang yimjak nung jembir aser pa indang tamangba yimsü aitsür den pai tetibo metokteper mesüra mekekteper.

Saka tawa Cinema Society ajanga "Guardians of the Galaxy Vol. 3" screening mapang Pratt-i iba indang jembir aser Page Six dang pa tamangba yimsü mechi dangari anema jembiba ya tang tasen masü ta ashi.

"Ibai tasen masü. Ni alima meyong asübo, alimai ni meimla, saka ni alima meyong masü.

Ibaji Yohan 15:18-20 lir," ta pai ashi.

"Ibaji yimya lir, tasen masü - küm 2,000 tejakdang parnoki Yisu-a sempa," ta Pratt-i ashi. Pa anemer tem den akmesen mesüi alir, ta Pratt-i Page Six dang ashi. "Küntok ama tekolak alilen liang, tejakleni oang, nü takep temelem lir," ta pai ashi.

Ita ka tejakdang actor aser TV personality Drew Barrymore indang talk show ka nung Pratt-i pa tamang indang jembir sülen tang tesüsa pai ano iba o ya jembiba liasü.

Iba mapang pai Barrymore dang pa kinungtsü Katherine Schwarzenegger ajuruba otsü aser Lai tekong kar lemsatepa liasü.

Pai 2018 küm MTV Movie & TV Awards

mapang Tsüngremi meimchir meimba indang jembiba liasü aser taküm küm tetenzüklen pai Instafram post ka nung ibaji lemshia tuyuba yong nüburtemi jembiba liasü.

Pratt-i taoba küm Men's Health den sensaksemba mapang, "Ni tamanger ka lir, ni tamangtir ka masü," ta ashiba ajanga nisung aika molungjang nung tasüngdangba balala arua liasü.

2018 küm pai MTV nung jembidang nüburtemi aitsüba ajanga pa tezü atangba Men's Health nung metetdaksü südi, ta aikati bilema liasü.

Saka pai tawa Yisu indang jembiba ajanga pa tamang nung tali akangshiba sayur.

ANO GO ABEN TSÜNGREM DEN

Tepela Aluruba

- T. Ken 126: 1-6.

Iba ken ya 2 chubatem 19 aser Isaia 37 nung Tsüngremi kechi inyak iba nungi agiteta zülu, kodang Hezekia, Yihuda nung chuba alidang Sennacharib aser Assyria armyi Yirusalem lungpang, Yihuda nung chiyongtsü asoshi kümzüktsü nüngdaka liasü, kechiaser tsükchirtemi lemang ajak nokdang Yihuda nung chiyongtsü mengui liasü. Parnok alu rui aotsü mokoki liasü. Tsük senti liasü. Nüburtem kümzüker külen kodang parnok alui ao, parnok telemtetba ka agi. Parnoki tsükji pei tanurtem atema amshitsü asü, mesüra proktsü? Aluyimertemi ajep kechiaser parnok tsük ali nung proktsü aküm(t.6). asenok ajak metsü proker aser tarurtem lir.

Tepela aluruba akatsü asoshi asenoki kechi inyaktsüla? Mezüngbuba, osangtajung metsüji prokang. Laishiba nung kuli asüba noksa aika lir (2 Kor.5:20; Zek.3:2; Matt. 4:19; 5:14). Osangtajung agi nüburtem atongbaji alu ayimba mesüka lir. Iba nung amalitep nungdaker, Kechiaser kari proker aser kari arur. Na aluruba nung shilem ka asü?

Aluruba asoshi nai sarasademang. Kümzüka malir asoshi na tanü ajebtsü akok, saka kenü na pelatsü (Gal.6:9). Shirnoki osangtajung proker parnok tepela alururtem asütsü. Tanabuba, ne rongsen Tsüngrem sentsüwangshi asoshi prokang. Asenoki prokba asenoki arutsü(2Kor 9:6-11). Nisung aikati tamagitsü nung pei rongsen lalur. Missionarytemi teyari atar, arogo ulushitsü arogoi teyari atar. Asenoki mokuri prokra asenok tepela alururtem asütsü ta Pauli ashi.

Tesembuba, Tsüngrem Tanela Temeshi prokang (Gal 6:6-8; 5:16-23). Asenoki ya koda inyaktsü? Asenoki Tanela mapatemji asen mulungjang nung ayutsüla. Kodang asenoki Tsüngrem o nung shisadangdir (T.ken 119:11), asenoki Tanela aluruba arutsü. Temulungjangji atsüki ka mesüka lir, anungji asenoki aji repringtsüla. Aji temulung meyipba. Temeshi alitsü mapang agiang, sarasademang, o nung shisadangang aser metsüji ne mulung nung remang.

Tanü nai inyakba ajakji aremer; metsü tajung arutsü jangjaang.

Uganda nung tamanger ka dak kanga sashia azük

Nairobi, Monupii/May 09 (Agencies):

Taoba mapang Islamic tesayur inyaka alir nisung ka Khrista dangi meyipba yong Muslim nung Uganda anüdoklen May 2 nü süchia oa azükba sülen mozü kidang lir, ta osang ajanga ashir.

Arishi küm 33 tain Shaquru Ndifuna ya azü jenti yimdokba sülen lganga jila nung medical clinic ka nung temang anepalur, ta yangji aliba Khristantemi ashir.

Ndifuna ya taoba mapang Mayuge District kübok Noor Islamic Mosque nung tesayur inyaka liasü aser pa ya lganga jila nungi mile 25 shi pilar Kaliro Town Council nung alir. Lganga jila nungi mile 25 shi pilar Namutumba tesem nung January ita open-air evangelistic sentong ka alidang pa

Khrista dangi meyip.

Pa tamangba yimsü melenba osang prokshi aser Noor Islamic Mosque nung putir kati pa senzusempongba mita repring tenzük aser April ita Islamic lenir aseme par ki semdanga liasü, ta yangji alir Khristanpuri ashi.

"Noor Mosque nung tesayur ka ama ni maoba atema parnoki asüngdanga liasü. Ni parnok dang dangalen mapa kar aliba ajanga marutet ta ashi. Parnok rongnung kati ni Khristan akumba indang ashi saka ni kecha melangzü. Iba sülen Muslim nung lenir aseme ki yutsür ao," ta Ndifuna-i Morning Star News dang ashi.

May 2 nikongdang 7:30 ako meta Muslim nungi nisung pezü par kidangi aru, ta pai ashi.

"Parnok tashiyim amshia kidangi aita Islamic tamangba yimsü mezüngmeshiogo ta ayimten aser Yisu ji Tsüngrem chir masü, aser külemtsü asoshi Allah dang Tsüngrem lir aser Muhammad ya Pa indang tesayur ka ta k ü n e m nangzükdaktsütsü merang," ta Ndifuna-i ashi.

"Ni Yisu ya Tsüngrem chir masü ta ashitsü memolung. Parnoki küdak azük tenzük."

Pa kinungtsü aser tanur asem takdang ka nung atsük aser pa kinungtsüi telephone ajanga medemer ka dangi phone asü aser pa dak azükba indang osang agütsü, ta osang ajanga ashi.

"Pa dak azüker temi yutsür ao, kü kinungbo süogo ta parnok bilem südi - parnok pa indang

phone mesüra oset tenüki junga mangur kecha nunga aser tango junga mekongshi," ta pa mesashiteter.

"Pai telong aketba dang ashi. c h i y o n g t s ü

Par medemertem ki bushia aru aser Ndifuna ya anasa aliba mozü ayokdak dokan kati anir oa first aid agütsü aser lganga nung aliba clinic kati yok, ta osang ajanga ashi.

"Imlibilema ozü tanurtem anepaluang, kechiaser ni kumzüktsü asü masüar mejangja. Ni yirutsüba Muslim nung temi ni Islam aser dangi meyipdaktsütsü merang saka ni memolung," ta Ndifuna-i Morning Star News dang mozüki nungi ashi.

Ndifuna tenütsü achichilen zübu tuluka lir, teka achichilen lokpet aser parnok pa lensettsü merangdang tekong yirua liasü, ta osang ajanga ashir. Pa Uganda nung Khristanpuri reshikangshia amshiba osangtem Morning Star News ajanga bendenba ronung ibai tasenba alitsü. Uganda constitution aser danga tzüzüng-ozüng tem nung tamangba yimsü temeden agüja lir, pei yimsü dangar den lemsateptsü aser tamangba yimsü ka nungi kati meyiptsü melar. Uganda nütsüng yongsük shilem 12 shi Muslim nung lir aser parnok ya linük anüdoklen timba alir.

AO OSHI ANGAZÜKDAK:

TANÜ ANGAZÜKTSÜBA OJANG



Pungya

(v) temechei salaa naro aküm, lapok (bloom)

* Naro **pungyaba** mapang ninang kanga arur.

Pungzük

(v) jokzüka alu (jump down)

* Lenkalem nungi onok ajak külemi **pungzük**.

OLONG PAITEP # 6510

1						2				3
								4		
5		6				7				
8										9
								10		
					11	12				
		13								
14						15				
					16					

TIPLÉN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6509 TELANGZÜBA

TIPLÉN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kiochtsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.

Agüja aliba noksa nung meputepi aliba 9 bushiang



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Chakma council elections nung voters 84% liasü



Aizawl, May 9, 2023

(Agencies): Mizoram nung züngsem 20 agi akümbe Chakma Autonomous District Council (CADC) election nung vote enoktsür 84% tema liasü. Ajisiüaka meta talang pilar aliba polling stations nungi osang

anguba sülen voting percentage teimba akümstsü akok ta ketdangsür kati ashi. Ghonda 10 voting asüandang law and order khuret kecha maliasü, ta Lawngtlai additional deputy commissioner & returning officer Abraham

Beirazi Khithie-i ashi. CADC menden 19 atema polling agiogo. May 4 nü Rengkhshya constituency nungi BJP candidate tepsetba ajanga Mizoram state election commission-i iba menden nung polling masütsü tetuyuba agütsü. Mizoram kübok CADC nung vote enoktsür ajak agi 34,474 lir aser parnok rongnung tetsür 17,019 dena lir. Chakma council election nung candidate ajak agi 74 liasü. Mizoram nung ruling party Mizo National Front (MNF), BJP aser Congress teloktemi menden 20 nung candidate yok. Mizoram nung main opposition party Zoram People Movement (ZPM)-i candidate 13 yok. CADC elections indang votes ya May 11 nü azüngtsü.

Sorkari Papumpare district nung internet services shibangtsür

Itanagar, May 9, 2023

(Agencies): Arunachal sorkari Papumpare district nung internet services shibangogo. May 9 nü ozüing alema mokdang ayongba mapang tensa aziüoka ayutsü atema internet services shibanger ta sorkari metetdaksü. May 9 aonung 7:00 ako nungi May 12 nikongdang 6:00 ako tashi internet services shibangtsü. Deputy Commissioner, Papumpare City mesüra IC aser Papumpare Rural ajanga

telecom service providers mesüra internet service providers nem tetuyuba agüjang ta sorkari metetdaksüogo. Nisung telok kati anogo asemnü mokdang ayongba ya ozüingi memelar ta Itanagar capital region Deputy Commissioner Talo Potom-i ashi. May 9 aonung 10:00 ako nungi 144 CrPC ozüing benoktsü aser bandh sobaliba anendaktsütsü atema flag march ka agitsü ta pai ashi. Bandh asüba dang nungi timi lungkak aitba sentong balala lir

ta May 7 nü Arunachal Home Minister, Bamang Felix-ia shia liasü. "Bandh sobaliba atema tebilemstsü abener. Item sentong ajanga taküm libaliro nung tetsükdaksü agütsür aser nisung ajak timtemer. Iba ajanga rongsenketzüng maparen nung takoksa tulu ajurur aser nika kiojen akoksaba den ozüing alema mapa inyakra nisungtem yirur. Tebilemstsü onük lemsateptsü atema tanga timi inyakba maparen aika lir" ta Bamang Felix-i metetdaksü.

Assam sorkari Rs 8,000 crore tema indang MoU sign sütep

Guwahati, May 9, 2023

(Agencies): Assam sorkari Mongulbarnü industries aser companies balala den Memorandum of Understanding (MoU) nung sign sütepogo. Rs 8,000 crore atema MoU agiyepogo ta Chief Minister Himanta Biswa Sarma-i ashi. Company 10-i Assam sorkar den mega industrial projects inyaktsü atema sign sütep ta Chief Minister Office (CMO) ajanga metetdaksü.

Assam state sorkar küm 2 abensatsü lia Himanta Biswa Sarma tsüngdang MoU nung sign sütepogo aser FMCG, cement, glass o EV's mapatongtem dena lir ta CMO-isa ashi. "State sorkar küm 2 abensatsü lia asen rongsenketzüng mera tasen ka ayaoker. Iba ajanga Rs 8,200 crore endoka mapa inyaktsü aser mapa tasen 6,100 adokdaksütsü. Ano

teinyaktsüaika lir. Assam renlokba nung tamang akar ajak dang pelar" ta CM Sarma-i ashi. Assam sorkari PepsiCo India, Varun Beverages, Calcom Cement India, Star Cement NE Ltd, Century Float Glass Ltd, Taj Cement Manufacturing Pvt. Limited, Star Cement India Limited, DS Group aser Centre for Perishable Cargo (Adani Groups) den MoU nung sign sütep.



Arunachal Pradesh Chief Minister Pema Khandu-i Tomo Riba Institute of Health and Medical Sciences nung Block II lapoktsüdang agiba noksa angur. Arunachal Pradesh nung medical college-cum-hospital nung Emergency & Trauma department aser Tesla MRI scanners asem lapoktsüogo. Chief Minister Pema Khandu-i health minister Alo Libang den külemi hospital complex nungi 100 medical utility vehicles sayatsü. (Naharlagun, May 9)

Pakistani Rangers temi Imran Khan puogo



Mongulbarnü Islamabad High Court nung ochimashi ken o jembitsü atema taoba Pakistan ato kilonser aser Pakistan Tehreek-e-Insaf tekolakba Imran Khan arua lia court kima Pakistani Rangers temi pa pua bener aodang tangokba noksa nung angur.

Islamabad, Monupii/May 09 (Agencies): Mongulbarnü Pakistani Rangers temi Islamabad High Court kima taoba Pakistan Ato Kilonser Imran Khan puogo.

Pakistan Tehreek-e-Insaf (PTI) tekolakba ya Al Qadir Trust ken o dak sendakba nung apu, aser iba atema National Accountability Bureau (NAB) ajanga pa aiben jaoker liasü.

Taoba ato kilonser ya pa indang bail atsülangshitsü atema okadaki arua lia NAB-i asüngdangba ama Rangers temi apu.

Court balala nung Khan anema ken o 120 dak tema benoka lir. Pa ya NAB courts temi Bodhbarnü anir arutsü imlar.

Inspector General of Police, (IGP) Islamabad Dr Akbar Nasir Khan-i osangbener dang tensa azioka lir ta ashi. Kasa mapang PIT ajanga noksa tem lemsatepba nung Imran Khan indang okatsür ka Khan apuba mapang yiruba sayuogo.

Khan ya court nung biometric agidang Pakistani Rangers temi apu ta ashir.

PTI nungi longkak aittsü teimla nung Islamabd Capital Territory nung Section 144 benoka lir.

Islamabad High Court nung Imran Khan anema ken o ana benoka aliba nung pai bail applications agütsüba ken o jembidaki Mongulbarnü pa Islamabad-i arua liasü.

Pa Islamabad-i marudang aputsü asoshi renema lir ta shia liasü aser osangbener Arshad Sharif tepsetba nung pa anaben tepsettsü merang ta tai tonglokja alisang ISI officer Major-General Faisal Naseer densema lir ta nenshia ashi. Lahore nung rally ka nung pai jembidang iba o ya shia liasü.

"Inter-Services Intelligence indang Major-General Faisal Naseer-i ni anaben tepsettsü merang. TV anchor Arshad Sharif tepsetba nung pa densema lir. Pai ozü party Senator Azam Swati mangsa kumtsü aser reshikangshia

amshi," ta Khan-i ashi.

Arshad Sharif ya Army asoshi timtem liasü, aser pa security agency tem nungi amokmerener ta shia taoba küm October ita linük nungi jena aodang Kenya nung tepset.

Mongulbarnü Imran Khan-i ano nenshia aija liasü. "Ni mayazükdang ojang ana shiner. Mezüngbuba nung, ISPR ajanga sangdong ka nung parnok mezüngmeshiogo - army mezüngmeshiogo ta ni anaben tepsettsü merangsang intelligence officer tenüng teta ashi," ta PTI tekolakbai ashi.

"Ibai kü army aser kü Pakistan. Ni tiazü jembitsü menüngdak. ISPR sahib, ni ashiba kanga junga angaang. Akumtsübu ka institution ka kisüng atema masü, akumtsübu ya senso ajak atema asütsüla," ta Khan-i video nung ashi.

"Kü indang ken o mali. Parnoki ni tepuokdaki yokner, aser iba atema ni renema lir," ta taoba ato kilonseri shia liasü.

Pa apuba indang sangdongba mapang taoba

Pakistan minister Fawad Chaudhry-i ashiba agi, "Taoba Ato Kilonser Imran Khan Court kima nungi pua bener ogo, okatsür aser nübur aika merenshi, Imran Khan ya mejangjaba nisungtemi mejangjaba tesemi anir ao."

Islamabad High Court indang chief justice ajanga interior secretary aser IG police dang minute 15 tsüngta court-i arutsü metetdaksüogo, ta paisa ashi.

Al Qadir Trust ken o ya taoba ato kilonser aser pa kinungtsü Bushra Bibi nati real estate firm nungi PKR50 billion legal kumdakja Pakistan nung sen billion aika agiba indang lir.

Imran Khan apuba indang sorkari sangdong kecha agüja mali. PTI Chairman Imran Khan apuba ajanga linük nung timtem ajurua aliba bentettsü aser pai linük anema tasam tamajung yanglur, ta Pakistan Information Minister Marriyum Aurangzeb-i Hombarnü shia liasü.

Myanmar nung aid convoy ka amak

Yangon, Monupii/May 9 (Agencies): Southeast Asia linüktem nungi diplomat tem mena aliba aid convoy ka amakba sülen Association of Southeast Asian Nations (ASEAN) züngsemtem senden amenba mapang Myanmar indang onük ya ajak dang tongtipangtiba asütsü.

Iba lendong nung ketdangsurtem ka danga meyirui jenbogo aser Shan State nung iba convoy amakba telok kati danga nangzüka mali.

Tang ASEAN mendenbuba Indonesia tir Joko Widodo-i iba tatalokba aitsüogo aser "tashiyim amshiba, aser azütokshi anenang, kechiyong iba ajanga nüburtem dang akoksatsü," ta ashi.

Azütokshi lendong balala ajanga 2021 küm February ita military-i sorkar atsüngba sülen Myanmar nung human rights dak sendakba nung mepetmesü adoker aliba sayur aser iba atema jenjang tapet magiba asoshi ASEAN aija arudar.

Myanmar indang National Unity Government (NUG), kong

military-i atsüngtokba nüburtemi shimba lenirtem densema lir parnoki Al Jazeera dang ashiba agi, ASEAN-i general tem den sensaksema aliba tangsa tang anentsüla aser iba melena NUG den sensaksemtsüla, kechiyong NGU ya chichiba linük tenüng nung nokdakertem lir.

"ASEAN-i NUG ya chichiba Myanmar representative ta agizüksüla," ta NUG Foreign Minister Zin Mar Aung-i Al Jazeera dang ashi. "ASEAN-i military junta den dang masü saka tanga stakeholder tem dena sensaksemtsüla," ta lai ashi.

Myanmar ya taoba military sorkar mapang ASEAN nung aden, ajisüaka linük atsüngba sülen military-i shimba minister tem ASEAN senden nung shilem magidaktsüi arudar. Zin Mar Aung-i ashiba agi, iba hopta Labuan Bajo nung senden amenba mapanga military mesüra NUG-i shilem agitsü mimlar.

ASEAN senden ya May 9 nungi 11 tashi agitsü. 2021 küm senden amenba


Office of the
Longpok Semchir Telongjem
HQ: MOKOKCHUNG

TENÜNGSANG AGÜTSÜR

Longpok Semchir Telongjem mendenti ajanga Longpok Semchir lenirtemi 14th Buba Nagaland Legislative Assembly General Election nung takok tulu ngutetba asoshi tenüngsang aser tetushi tulu agütsür.

1. Wb. Sharingain Longkümer, Hon'ble Speaker, Nagaland Legislative Assembly, Govt. of Nagaland.
2. Wb. Temjen Imna Along Longkümer, Hon'ble Minister, Tourism, Higher Education, Govt. of Nagaland
3. Wb. Moatoshi Longkümer, Hon'ble Advisor, Labour, Employment, Skill Development and Excise, Govt. of Nagaland
4. Wb. Imkongmar Longkümer, Hon'ble Advisor Minority Affairs, Sericulture, Govt. of Nagaland.
5. Wb. Noklutoshi Longkümer, Hon'ble Member of Legislative Assembly, (MLA), Govt. of Nagaland.


Asen Lenirtem takok tajung ngua Longpok Semchirtem ajak tejak tenteta pelateper. Teyanglur Tsüngremi lenirtem wadang ajak nung len ania Naga nung ajak atema lensar tajung kaka südakjangma ta Tsüngrem dang taochi meshizüksür.


Sd/-
K. Nokmarenba
Tir

Sd/-
Imkongnungba
Tongti Zülur

Office of the
Molunger Chir Telongjem
H.Q: Mokokchung, Nagaland
SANGDONGER

Molunger Chir Longpok, Longjakrep semchirtem yim kwi nung prokshia ali, ajak dang yamai sangdonger. Molunger otsü ketdangpur majangi shingiaia zülutsü/jembitsü memelar. Kari danga Molunger otsü metetnera ketdangpur dang taginüba otsü asüngdangteptsü lenmang sadema lapoktsür aser pelashishia lemsateptsü.


(I) Toshi Sanglir
President


(Er, Lanu Nokdir)
Secretary

PUBLIC NOTICE

 Registered office: Landmark, Race Course Circle, Vadodra 390 007.
Corporate office: ICICI Bank Towers, Bandra-Kurla Complex, Mumbai 400 051.
GOLD E-AUCTION CUM INVITATION NOTICE

Tsünglangen agüja aliba sen apur dang hon agi yangluba osettem alangtsü asoshi temonoktsü sen anünga aliba menoktsü atema osang agüja aru. Parnoki ICICI Bank Limited ("ICICI Bank") nungi "facility" agi. Parnoki sen agia aliba memonoktet nung onoki **May 20, 2023** nü züngzüktepa aliba gold ornaments ya E-Auction asütsüsa akumer. ICICI Bank ajanga jelia osang magütsü account indoktsü/E-Auction anogo melentsü tashi lir. Auction ya online ajanga <https://jewel-auction.procuretiger.com> nung anüngdang **12:30 nungi nikongdang 3:30** ako tsüngda agitsü. Terms and conditions tali tejangjaba nung metettsü atema website nung angutsü. Sen apur sür lira, conditions ajak ozüng agi melaba senmanger den kasa alitsü.

Loan A/C No.	Customer Name
047605000867	Harindra Paswan

Date : 10.05.2023
Place : Dimapur

S/d
Authorised Officer
For ICICI Bank Limited

mapang coup lenir Min Aung Hlaing den yimjung asoshi onük pongu benokba inyaksangshi mesütetba ya ASEAN asoshi tamakok lir, ta ken o asadangeritemi ashi.

Onüktemrongnung azütokshi anentsü, telok ajak tsüngda sensaksemtsü, special envoy ka shimtsü, ASEAN-i humanitarian teyari agütsütsü aser Myanmar dangi bloc indang special envoy kati linük semdanga party ajak den ajuruteptsüba densema lir.

Ajisüaka azütokshi anentsü melena Myanmar military-i civilian tem aser parnok anemertem tali amak tenzükgogo, kong yimden yimsütsüba tsütsü tepuokdaki yoker pezü aletsseta südaktsüba, taoba ita Sagaing tesem nung tayimtsü amshia yimtsüng ka maka nüburtem aika tepsetba densema lir.

Zin Mar Aung-i ashiba agi, ASEAN summit ya sentong ka yanglutsü aser NUG nem shilem agidaktsütsü atema telemtetba ka agitsü asoshi maongka ka asütsü. "Onük pongu benokba ya

teperi masü," ta lai ashi. "Onük ya alentsü asoshi jenjang agia mali aser benoka minyaker. Iba onük pongu ya coup lenir Min Aung Hlaing-i agizük saka pai nangzüka ama minyaker," ta laisa shisem.

"NUG medeni onük pongu yanglur aliba ya benoka minyaktettsü," ta Aung-i ashi.

Kasa mapang nung mongintemi ashiba agi, aid convoy amakba ya regional bloc asoshi tekümdangtsüka asütsüla.

"Diplomats convoy ka amakba ya ASEAN asoshi saksalemba mapang ka asütsüla," ta Human Rights Watch Deputy Asia Director Phil Robertson-i ashi.

Diplomats convoy amakba ya state media-i kiralongrartem ta shia convoy nung garitem raksar aliba noksa lemsatepa liasü.

Kasa mapang nung People's Defence Forces-i iba convoy amak ta tai tongloktsüba ya NUG magizüki liasü.

Military-i parnok anemertem ajak ya kiralongrar kümdaktsür.

Fakhar & Chaiwai na nem ICC players of the month naroküm agütsü



Fakhar Zaman

Naruemol Chaiwai

Monupii/May 9, 2023 (Agencies): April ita atema Pakistan nung batter Fakhar Zaman nem ICC Men's Player of the month aser Thailand captain Naruemol Chaiwai nem ICC women's Player of the month naroküm agütsüo.

Tenapronglai April ita kanga junga asayaba sülen ICC Hall of Famers, taoba international asayatem, media representatives aser icc-cricket.com nung züngoksema aliba cricket fan temi vote agüja iba naroküm agütsüo.

2022 kum November ita Sidra Ameen-i iba naroküm agizükba sülen Fakhar ya Pakistan nung rongnungi iba naroküm agizükba mezüngbuba asayar kumogo. New Zealand den asayaba mapang asaya ana atonga century yangluba sülen pa

nem iba naroküm agütsü. Rawalpindi nung mezüngbuba ODI asaya asayaba mapang pai ball 114 nung run 117 aser iba asaya ya parnoki wicket 5 agi koka liasü.

Kasa tesem nung tanabuba asaya nung run 337 arishiba mapang Fakhar-i ball 144 nung out mesüi run 180 yanglua par team-i asaya akokba nung tongtimbang shilem agi.

Iba naroküm atema Fakhar-i, Mark Chapman (New Zealand) aser Prabath Jayasuriya (Sri Lanka) na ajateta liasü.

Kasa mapang nung Thailand-i otsüsütsüsa Zimbabwe den ODI asaya 3-0 agi akokba asayamung nung Chaiwai-i kanga junga shilem agia la nem iba naroküm agütsüo.

Thai captain yagi iba asayamung nung out mesüi half century ana yanglua liasü aser la nem Player-of-the-Series naroküm dena agütsü.

Mezüngbuba asaya nung lar team run 21 ka yanglur asayar 4 out ser aliba mapang la batting ameni ai aser lai out mesüi run 57 yanglua team nem teyari agütsü aser iba sülen parnoki Zimbabwe team run 78 dang yanglur ajak out sütsü.

Tatembangbuba ODI asaya nunga lai ball 60 nung run 52 yanglua Thailand team takok dangi ania liasü.

Maneni ODI asayamung tembangba sülen T20I asayamung nunga lai run 55 yanglu aser tanabuba asaya nung lai run 29 yanglua lar team-i wicket 5 agi Zimbabwe akokba nung teyari agütsü.

Prannoy & Sindhu nati anir India team Sudirman Cup asayatsü

Monupii/May 9, 2023 (Agencies): World No. 9 HS Prannoy aser Olympics nung medal ana tashi ngur alila PV Sindhu nati anir India team 2023 Sudirman Cup asayatsü, koba Suzhou, China nung May 14 nungi 21 tashi asayatsü renema lir.

Senior national selection committee-i parnok ajurua iba asayamung akoktsüsa team kanga liromedema shimogo. India-i iba asayamung ya tang tashi nung khen danga koka mali.

India tebur team-i otsü tasen ka yanglua taoba kum mezüngbuba Thomas Cup kokogo aser takum kum tetenzüklena Asian Mixed Team Championships nung bronze medal anguba sülen iba asayamung nunga takok tajung angütsü imlar.

"Sudirman Cup ya kanga

tongtimbang asayamung ka lir aser selector temi domestic aser international asayamungtem nung result dak ajemdaker asayatem shimogo. Iba team yagi takum medal angütsü ta onoki temulung lema bilemer," ta Badminton Association of India secretary Sanjay Mishra-i ashi.

Iba asayamung nung India team Group C nung Malaysia, Chinese Taipei aser Australia

den ata lir.

Satwiksairaj Rankireddy shiba yiruba ajanga Asian mixed team event nung shilem magitet, pa meyipa aruba ajanga tebur tarep team tashi taitba kümdaktsütsü aser kasa mapang nung Ashwini Ponnappa aser la indang partner tasenba Tanisha Castro natia All England semi-finalists Gayatri Gopichand aser Treasa Jolly na nem teyari agütsütsü.

India team yamai alitsü:

- Men's singles** : HS Prannoy, Kidambi Srikanth (Reserve: Lakshya Sen)
- Women's singles** : PV Sindhu, Anupama Upadhyaya (Reserve: Aakarshi Kashyap)
- Men's doubles** : Satwiksairaj Rankireddy/Chirag Shetty, MR Arjun/Dhruv Kapila
- Women's doubles** : Gayatri Gopichand/Treasa Jolly, Ashwini Ponnappa/Tanisha Crasto
- Mixed doubles** : Tanisha Crasto/Sai Pratheek.

WBC: Deepa aser Nishant na quarter-finals-i iogo

Monupii/May 9, 2023 (Agencies): Tashkent, Uzbekistan nung tang asaya aliba IBA Men's World Boxing Championships nung Deepak Bhoria (51kg) aser Nishant Dev (71kg) nati Mongolbarnü pei tata asaya koka quarter-finals-i iogo.

Pre-quarterfinal nung China nung asayar Jiamao Zhang den asayaba mapang Deepak-i tetenzük nungi asaya amokbanger asaya aser 5-0 ta unanimous decision agi asaya koka liasü.

Mezüngbuba round nung Deepak-i kanga kara arakzüa pa den asayar dak kanga junga tsüngshia asaya ajisüaika tanabuba round nungbo pai defend süa asaya aser maongka tajung anguba mapang dang attack süa liasü.

Tasembuba round nung Zhang-i takok tashi attack süa

asayatsü merang, ajisüaika pa dang nungi Deepak takaraba liasü aser pai asaya ayong ayonga akok.

Pa taruba asaya Kyrgyzstan nung asayar Diushebaev Nurzhigit den asayatsü aser India atema medal kabosa angütsü merangtsü.

Kasa mapang nung pre-quarter asaya tanga ka nung Nishant Dev-i Palestine nung asayar Nidal Foqahaa mezüngbuba round nung RSC agi koka liasü.

Foqahaa-i pa aso alangka maongka agia Nishant Dev kinükleni air oa asaya ajisüaika India nung asayar yagi pa dak kanga sashia atsüng tenzükba sülen referee-i asaya anendakja liasü.

Nishant Dev Bodhbarnü quarter-finals nung Cuba nung asayar Jorge Cuellar den asayatsü.

Lionel Messi-i Laureus awards angu



Monupii/May 9, 2023 (Agencies): Argentina aser Paris Saint Germain nungi asayar Lionel Messi-i kija aser team Laureus award agizükogo.

Taoba kum December ita Qatar nung World Cup akokba sülen arishi kum 35 tain asayar yagi Paris nung sentong ka agiba mapang iba naroküm agizük aser iba den team award dena agizüka liasü.

Pai taoba mapang iba naroküm ya British Formula One champion Lewis Hamilton den külemi 2020 kum agizük aser liasü.

Kasa mapang nung Jamica tsür Shelly-Ann Fraser-Pryce, shiba taoba kum August ita Eugene, Oregon nung world 100m race pongububa koka liasü la nem female athlete award agütsü aser US Open tennis champion Carlos Alcaraz-i World Breakthrough

of the Year award agizüka liasü.

Kasa mapang nung Denmark aser Manchester United nungi asayar Christian Eriksen nem Comeback of the year Award agütsü, shiba kum ana tejakdang Euro asayaba mapang temulungjang mapaminyaki kuma longdaka liasü.

Swiss para-athlete asayar Catherine Debrunner-i la asoshi mezüngbuba marathons ana akokba sülen Disability Award agütsüo.

Sport for Good Award ya TeamUp nem agütsüo. Iba ya Robert Lewandowski-i rara ajanga pei talidak ki toktsür aoba tanurtem atema tenzüktsüba programme ka lir.

Maneni Chinese-American Olympic ski freestyle champion Eileen Gu nem World Action Sports person accolade agütsüo.

BILEMDANGANG

"Shinga sülena tanidak saka ajak dang nungi angazükang."